

Naslov
Fondacija CURE
Izveštaj 2020.

Izdavačice
Fondacija CURE

Urednica
Medina Mujić

Lektura
Enida Čamdžić

Prelom
Tanja Ćurić

SADRŽAJ

Uvod	4
Misija Fondacije CURE	5
Vizija Fondacije CURE	5
Identitet Fondacije CURE	6

PROJEKTI FONDACIJE CURE

Rodno uvjetovano nasilje: Pogled iz drugog ugla – Nasilje u vezama mladih	12
Ženska prava - Agenda za pozitivne promjene	13
Integrirana sigurnost za žene (ISW)	15
Feminističke zalagačke politike u Bosni i Hercegovini	16
Žene i izgradnja mira u Bosni i Hercegovini	18
Mapiranje jednoroditeljskih zajednica i njihovih prava u općini Centar	20
COVID -19 solidarnost	21
SADA JE VRIJEME	22
XV PitchWise festival ženske umjetnosti i aktivizma u BiH	23
Ženska mreža BiH	24
Globalna kampanja 16 dana aktivizma protiv rodno zasnovanog nasilja i ulične akcije	25

CURE PARTNERSTVA

Inicijativa za afirmativne izmjene i dopune udžbeničkog sadržaja u srednjim školama u Kantonu Sarajevo	26
Inicijativa „Građanke za ustavne promjene“	27
Mir sa ženskim licem	28

MREŽE U KOJIMA JE FONDACIJA CURE AKTIVNA

Mreža za izgradnju mira	29
Anna Lindh Fondacija	29

OSTALE AKTIVNOSTI FONDACIJE CURE

Dan bijelih traka	30
8. MART	31

POZITIVNA PRIČA VOLONTERKE	32
CURE PUBLIKACIJE I ISTRAŽIVANJA	33
AKCIONI PLANOVI	34
MEDIJSKA VIDLJIVOST	36
DONATORKE I DONATORI	38

FONDACIJA CURE IZVJEŠTAJ ZA 2020. GODINU

UVOD

Osnovana 2005. godine, Fondacija CURE (CURE) je feminističko-aktivistička organizacija koja djeluje za jednakost spolova i rodova zalažući se za pozitivne društvene promjene putem obrazovnih, umjetničko-kulturnih, istraživačkih i zalagačkih programa. Organizujući afirmativne akcije, CURE slave snagu i moć žena, te rade na osnaživanju žena i djevojčica i drugih rodno senzitivnih osoba kako bi postali/e pokretači/ce društvenih promjena u BiH i svijetu. Feministički aktivizam je omogućio siguran prostor u kojem su žene jake, neustrašive, sposobne i ujedinjene u svim svojim različitostima. CURE je organizacija aktivistkinja/a, profesionalki/aca i volonterki/a koje/i izlaze na ulice u znak javnog protesta protiv nasilja, diskriminacije, kršenja zakona, ženskih prava i osnovnih ljudskih prava, organizuju performanse protiv nasilja, pozivaju umjetnice/ke, naučnice/ke, edukatorice/re, aktivistkinje/te, građanke/e, predstavnice/ke marginalizovanih i ranjivih skupina na akciju i konkretan lični doprinos za kreiranje boljeg i zdravijeg bosanskohercegovačkog društva, te kroz različite zagovaračke mehanizme utiču na kreiranje javnih politika socijalne pravde i najviših standarda poštivanja ljudskih prava.

Doprinoseći stvaranju i razvoju solidarnog i inkluzivnog ženskog pokreta u Bosni i Hercegovini i svijetu, CURE su nositeljice društvenih promjena kojim se poboljšava status žena i djevojčica, te marginalizovanih društvenih skupina, čime žene postaju ravnopravne i aktivno učestvuju u donošenju i provođenju odluka.

Tim trenutno okuplja deset snažnih žena različitih dobnih, nacionalnih, profesionalnih, aktivističkih i interesnih profila, okupljenih oko zajedničke misije i vizije, ali i sa snažnim ličnim

stavom o prioritetnim aspektima djelovanja Fondacije CURE, te o najvažnijim društvenim temama kojim se CURE bave i kojim bi se trebale baviti.

Fondacija CURE podržava članice svoga tima u daljnjem razvoju njihovih ličnih kompetencija i interesa.

U proteklom periodu, pojedine članice CURE tima su za svoj rad i društveni angažman dobile međunarodne i državne nagrade

Misija Fondacije CURE

Fondacija CURE, kao prepoznata feministička organizacija, radi na podršci, jačanju kapaciteta i kreiranju sigurnog okruženja kroz edukativne programe, istraživanja, analize i javno zagovaranje, lokalno i regionalno umrežavanje, angažovanu umjetnost i aktivizam za sve žene, djevojke, djevojčice, aktivistkinje i feministkinje, za njihovo aktivno i odgovorno učešće u pozitivnim društvenim promjenama, izgradnji mira i kreiranju inkluzivnog i održivog ženskog pokreta.

Vizija Fondacije CURE

Fondacija CURE zalaže se za ravnopravnost žena i djevojčica u Bosni i Hercegovini, posebno onih iz društveno marginalizovanih skupina, za društvo bez patrijarhalnih normi u kojem se ne toleriše nasilje i diskriminacija i gdje su žene prepoznate kao odgovorne pokretačice i nositeljke pozitivnih društvenih promjena, te koje ravnopravno donose odluke u društvu.

Fondacija CURE nastoji doprinijeti kreiranju održivog i solidarnog ženskog pokreta koji uvažava generacijske i sve druge razlike, ima kapacitet, znanje i snagu da pokrene, podrži i iznese procese koji će dovesti do poboljšanja položaja žena, kao i drugih marginalizovanih društvenih skupina.

Strateški period od 2021. do 2023. Fondacija CURE će iskoristiti za dodatno profilisanje Fondacije, usmjeravanje ka prioritnim temama i jačanje organizacione strukture kako bi na najbolji način doprinijela daljem stvaranju i rastu ženskog pokreta u BiH i regiji.

Identitet Fondacije CURE

Fondacija CURE je feministička, antimilitaristička i antifašistička organizacija koja se primarno identifikuje i opredjeljuje kao feministička organizacija, prihvaćajući multiplicitet feminizma i svih tema od važnosti za dalji razvoj rodne ravnopravnosti u društvu smatrajući se motorom promjene koji doprinosi snažnijem razvoju ženskog pokreta u Bosni i Hercegovini. Drugi važan dio identiteta Fondacije CURE vezan je za insistiranje na uključivanju, na inkluzivnom pristupu, koji podrazumijeva izoštren fokus ka dodatno višestruko marginalizovanim grupama žena – Romkinjama, ženama i djevojčicama s poteškoćama u razvoju, ženama iz malih ruralnih zajednica, lezbejkama, biseksualnim i trans* ženama (LBT*), samostalnim roditeljicama, ženama treće dobi, ženama koje su preživjele nasilje i drugim društveno marginalizovanim kategorijama, te zagovaranje za njihovo uključivanje u sve društvene tokove, posebno na mjestima gdje se donose odluke, na ravnopravnim osnovama. Ovakva politika Fondacije čini CURE aktivistkinjama koje se zalažu za borbu protiv rodne, spolne, klasne, rasne, etničke, seksualne, zdravstvene i ekonomske isključenosti, te svake druge isključenosti žena i djevojčica po bilo kom drugom osnovu.

Aktivne i prepoznate kao predvodnice brojnih inicijativa unutar ženskog pokreta u BiH, Fondacija CURE se zalaže za detabuizaciju određenih tema unutar ženskog pokreta i u društvu općenito, protiveći se primjetnom i narastajućem trendu isključivog fokusa na „soft“ ili manje kontroverzne teme unutar bh. društva.

Identificirajući se kao feministička organizacija, Fondacija CURE se primarno fokusira na direktan rad sa ženama i djevojčicama, na njihovo osnaživanje o ženskim pravima i aktivizmu, te jačanju uloge žena i djevojčica u bh. društvu. S jedne strane, svojim radom motivišemo novu generaciju feministkinja i aktivistkinja, a s druge radimo na jačanju ženskog pokreta koji uvažava generacijske razlike i različite pristupe u načinu rada u odnosu na teme rodne i spolne ravnopravnosti, omogućavajući i njegujući individualizam unutar zajedničkog.

Svoju ključnu ulogu Fondacija CURE prepoznaje u okrenutosti ka razvoju ženskog pokreta, dok u sadašnjosti, kroz različite projekte javnog zastupanja i zagovaranja, učestvuje u stvaranju sigurnog i pozitivnog okruženja za feminizam i aktivizam. Promovišući kulturu nenasilja i antidiskriminacije, Fondacija CURE insistira na vidljivosti žene, njene uloge u društvu kroz javnost rada, ulični aktivizam i angažovanu umjetnost, te promociji ženske i feminističke perspektive na sva društveno - politička pitanja. Kombinujući aktivizam, saradnju s institucijama i umrežavanje u BiH i u regiji, Fondacija CURE obuhvata širok spektar ciljnih grupa i veliki dio javnosti. Ključ uspjeha upravo je u kombinovanju ovih različitih pristupa, kao i spremnosti tima Fondacije da se dodatno razvija u još jaču organizaciju koja će moći da odgovori na izazove u društvu. U nizu aktivnosti i programa koje Fondacija CURE provodi, postoje tri koja su prepoznatljivo vezana za sam identitet organizacije i okosnica su budućih programa i aktivnosti, kako zbog svoje programske, tako i zbog simboličke vrijednosti i činjenice da su potpuno otvorenog, inkluzivnog karaktera i omogućavaju učešće svih koji doprinose razvoju ženskog pokreta i feminističke misli u Bosni i Hercegovini.

To su: PitchWise Festival ženske umjetnosti i aktivizma, Osmomartovski marš, Ženska mreža BiH

PitchWise Festival ženske umjetnosti i aktivizma u BiH koji se od 2006. organizuje jednom godišnje, a postao je zaštitni znak Fondacije CURE kao jedinstven feministički međunarodni događaj koji objedinjuje aktivizam i angažovanu umjetnost. Festival je nastao iz ideje da se „osvoje” zapušteni javni prostori i transformišu u mjesto koje okuplja umjetnice uključene u rješavanje različitih društvenih problema, aktivistkinje, naučnice, feministkinje i sve druge zainteresovane za pitanja položaja žena u BiH i regiji. Kao važan društveni događaj u Bosni i Hercegovini, PitchWise su prepoznali i ostali društveno - ekonomski akteri i kao takav je brendiran.



Osmomartovski marš

Fondacija CURE tradicionalno organizuje i predvodi Osmomartovski marš u Sarajevu povodom sjećanja na početke ženskog pokreta i s ciljem skretanja pažnje javnosti na problem rodne neravnopravnosti u Bosni i Hercegovini. Svake godine Fondacija CURE poziva i predstavnike/ce marginalizovanih grupa, radnice, učenike/ce, studente/kinje, žene treće dobi, predstavnice institucija i akademske zajednice, predstavnike/ce medija, te građane/ke da se pridruže maršu.



osmomartovski marš i performans
NASILNIK UN VIOLADOR
NA TVOM PUTU EN TU CAMINO

13:00 h / osmomartovski marš
Parlamentarna skupština BiH (Trg BiH)

13:30 h / performans
park preko puta BBI Centra

Ženska mreža BiH

U prvoj polovini 2009. godine, Fondacija CURE je pokrenula inicijativu za formiranje Ženske mreže BiH (ŽMBiH). Ženska mreža BiH (ŽMBiH) zvanično je osnovana i počela je s radom 12. septembra 2009. godine na konferenciji pod istim nazivom, a u sklopu četvrtog PitchWise festivala ženske umjetnosti i aktivizma u BiH. Ženska mreža BiH neformalna je grupa koja danas okuplja preko 55 organizacija civilnog društva, pojedinki i pojedinaca koje i koji zastupaju i bave se ženskim pravima i podsticanjem rodne ravnopravnosti, te promovišu antidiskriminaciju, slobodu odlučivanja, jednakost, nenasilje i antimilitarizam, uz prihvatanje feminističkih vrijednosti djelovanja – mira, solidarnosti, povjerenja, zajedništva, jednakosti i različitosti.

Fondacija CURE definiše sljedeće ključne vrijednosti u kontekstu rada i funkcionisanja Fondacije, te u izgradnji i osnaživanju ženskog pokreta u BiH:


- Solidarnost među ženama
- Međugeneracijska solidarnost i prenos znanja
- Osnaživanje žena, posebno društveno marginalizovanih ženskih grupa
- Inovativnost u radu i pristupu
- Transparentnost unutar tima i spram drugih
- Feministički identitet
- Okrenutost ka različitim identitetima, potrebama i snovima žena i djevojčica
- Aktivizam kao način uticaja na pozitivne društvene promjene
- Kreiranje sigurnog prostora za žene i djevojčice
- Dosljednost u radu, te posvećenost ostvarivanju socijalne pravde
- Antifašizam

- Antimilitarizam
- Nenasilje
- Sloboda izbora i različitost identiteta

Ovom prilikom tim Fondacije CURE želi se svima zahvaliti na saradnji, podršci i solidarnosti.
Tim Fondacije CURE: Jadranka, Vedrana, Stela, Denija, Sanda, Tanja, Selma, Vildana, Ajna, Medina, Saša R., Sabina

Podržavateljke/i i saradnice/i Fondacije CURE: Safija, Saša K., Tatjana, Nina, Jade, Sabina i Goran

Članice Upravnog odbora: Zlatiborka, Kristina, Berina M., Berina Dž., Ana



WOMEN'S NETWORK
BOSNIA AND HERZEGOVINA
PEACE WITH A WOMAN'S FACE

www.zenskamreza.ba
ALL VISIBLE - ALL EQUAL

PROJEKTI FONDACIJE CURE

Rodno uvjetovano nasilje: Pogled iz drugog ugla – Nasilje u vezama mladih

Kroz ovaj dugogodišnji projekat, Fondacija CURE fokusira se na osnaživanje mladih žena i djevojaka u smislu jačanja njihovih kapaciteta u oblasti ženskih prava kako bi doprinijele zaustavljanju rodno zasnovanog nasilja. Tokom 2020. godine, direktno smo saradivale sa 337 osoba putem radionica, sastanaka sa predstavnicima/ama institucija, performansa, radionica sa srednjoškolcima/kama, treninga za trenerice (FEM kamp), sastanaka sa volonterkama, uličnih akcija itd. Tokom radionica i seminara intenzivno smo radile sa 40 mladih žena iz BiH. Osim Treninga za trenerice, mlade aktivistkinje koje su prisustvovalе treningu održale su jednodnevne treninge u svojim lokalnim zajednicama u Sarajevu i Zenici.



Ženska prava - Agenda za pozitivne promjene je projekat kojeg finansira Evropska unija, a realizuje Fondacija CURE i Fondacija za osnaživanje žena (FWE), a ima za cilj doprinijeti promociji i poštivanju ženskih prava, te iskorjenjivanju diskriminacije žena s posebnim fokusom na žene i djevojke pripadnice marginalizovanih i manjinskih grupa u deset (10) opština.

Provedba projekta u 2020. godini uključivala je ukupno 30 aktivnosti koje su se realizovale u pet lokalnih zajednica, a to su: Konjević - Polje/Bratunac, Hajderovići/Zavidovići, Konjic, Sarajevo i Vareš.

- U Konjević - Polju i Bratuncu organizovale smo četiri radionice i dva okrugla stola s ukupno 50 učesnika/ca (45 predstavnica NVO sektora i aktivistkinja i pet predstavnika/ca institucija i medija);
- U Hajderovićima i Zavidovićima organizovale smo četiri radionice i dva okrugla stola s ukupno 22 učesnika/ca (17 predstavnica NVO sektora i aktivistkinja i pet predstavnika/ca institucija i medija);
- U Konjicu smo organizovale četiri radionice i dva okrugla stola s ukupno 38 učesnika/ca (28 predstavnika/ca NVO sektora i aktivista/kinja i 10 predstavnica institucija i medija);
- U Sarajevu smo organizovale četiri radionice i dva okrugla stola s ukupno 23 učesnika/ce (16 predstavnica NVO sektora i aktivistkinja i sedam predstavnika/ca institucija i medija);
- U Varešu smo organizovale četiri radionice i jedan okrugli sto s ukupno 29 učesnika/ca (25 predstavnica NVO sektora i aktivistkinja i četiri predstavnika/ce institucija i medija).

Konferencija zaštitnica ženskih prava, žena aktivnih u politici, naučnica i aktivistkinja na temu: „Feminističke zalagačke politike u Bosni i Hercegovini” organizovana je u sklopu projekata Ženska prava – Agenda za pozitivne promjene, kojeg finansira Evropska unija, a realizuje Fondacija CURE (CURE) i Fondacija za osnaživanje žena (FWE) i Feminističke zalagačke politike u Bosni i Hercegovini kojeg podržava Kvinna till Kvinna. Na Konferenciji je održano ukupno pet panela a prisustvovalo je 40 učesnika/ca (35 predstavnica NVO sektora i aktivstkinja i 5 predstavnika/ca institucija i medija)



Integrirana sigurnost za žene (ISW) je projekat kojeg finansira Global Fund for Women s ciljem da se istraži kako braniteljke ljudskih prava i aktivistkinje mogu bolje razumjeti prijetnje i rizike (unutrašnje i vanjske) s kojim se suočavaju, kao i strategije kojima mnoge od njih već imaju pristup i praksu, a kako bi ublažile uticaj rizika i zaštitile sebe i održale kako svoj, tako i aktivizam svojih organizacija i pokreta.

U 2020. godini smo u sklopu ISW projekta održale dvije radionice s ukupno 32 učesnice.

Na prvoj održanoj radionici prisustvovalo je 17 učesnica, a na drugoj 15.



Feminističke zalagačke politike u Bosni i Hercegovini – Fondacija CURE je tokom 2019. i 2020. godine implementirala projekat pod nazivom Feminističke zalagačke politike u Bosni i Hercegovini koji je podržala švedska fondacija Kvinna Till Kvinna.

Provedbom ovog projekta Fondacija CURE je pružila podršku zaštitnicama ženskih prava radi njihovog uključivanja u procese donošenja odluka, i to naročito onih koje se donose na lokalnom nivou i koje se tiču društveno marginalizovanih žena. Projekat se provodio u Gračanici, Čapljini, Mostaru, Brčkom i Sarajevu i predstavlja sastavni dio naših zalagačkih aktivnosti. Održane su radionice iz oblasti zalaganja za ženska prava i organizovani javni okrugli stolovi tokom kojih smo diskutovale o problemima s kojima se susreću žene u našem društvu. Radile smo na jačanju položaja društveno marginalizovanih žena, te zagovarale punu implementaciju CEDAW, Peking +25 i GREWIO preporuka. U okviru projekta izrađen je zalagački priručnik i poster koji su namijenjeni široj javnosti, te svim zainteresovanim osobama koje žele da rade na unaprjeđenju položaja žena i djevojčica u Bosni i Hercegovini.

Posebnu pažnju smo posvetile podršci ženama za vrijeme lockdown-a uzrokovanog pandemijom COVID-a 19, te smo svoja iskustva i naučene lekcije oblikovale u zalagačke dokumente usmjerene prema izvršnoj vlasti u Bosni i Hercegovini.

Nadalje, u okviru programa Feminističke aktivnosti zagovaranja za ekonomsko osnaživanje i društveno-ekonomske mjere podrške za većinu marginalizovanih skupina žena, koji se realizira kao dio projekta Zagovaranje feminističke politike u Bosni i Hercegovini koji podržava Kvinna Till Kvinna, održale smo šest zagovaračkih sastanaka s predstavnicima/ama institucija na kojem je učestvovalo više od 20 osoba. Uputile smo set ekonomskih mjera koje se odnose na novu Strategiju zapošljavanja FBiH za period 2021.- 2027. godinu Federalnog ministarstva za rad i socijalnu politiku s ciljem njenog orodnjavanja. Izrađena je brošura pod nazivom „Ko ti kontroliše novčanik? Kako prepoznati ekonomsko nasilje nad ženama i djevojkama?“ s ciljem podizanja svijesti javnosti o prevenciji ekonomskog nasilja nad ženama i marginalizovanim grupama žena.



Žene i izgradnja mira u Bosni i Hercegovini je projekat kojim smo željele podići svijest bosanskohercegovačkog društva i međunarodne zajednice o potrebi uključivanja žena u sve faze mirovnih pregovora i izgradnju mira.

Implementacija projekta rezultirala je publikacijom i filmom „Suočavanje s nemirom i izgradnja mira iz perspektive postdejtonske žene“. Publikacija istraživačice/autorice Ajne Jusić temelji se na lekcijama žena koje su preživjele sve oblike nasilja u Bosni i Hercegovini i pruža priliku za dijeljenje poruka o otporu, konfliktu, preživljavanju, nadi i miru iz ženske perspektive. Nakon 25 godina od potpisivanja Daytonskog mirovnog sporazuma, Bosna i Hercegovina još uvijek nije uspjela prevladati posljedice nedostatka ženskog sudjelovanja u mirovnim pregovaračkim procesima. Kao što je poznato, žene nisu bile prisutne za pregovaračkim stolom, pa stoga mirovni sporazum nije uzeo u obzir potrebe žena, djevojaka i djevojčica što je rezultiralo dugoročnim negativnim učinkom na svakodnevni život građana/ki. Žene u bh. društvu i dalje su na samim marginama, ne odlučuju o važnim ekonomskim i političkim pitanjima, ne sudjeluju u bitnim odlukama o sadašnjosti i budućnosti njihove zemlje, ne pregovaraju o ustavnim promjenama ili reformskoj agendi, a nema ih ni u Predsjedništvu Bosne i Hercegovine. Publikacija i film sadrže priče žena iz Konjević - Polja, Bratunca, Srebrenice, Konjica, Srebrenika/Tinje, Bosanskog Grahova, Bihaća, Drvara i Prijedora.

U publikaciji „Suočavanje s nemirom i izgradnja mira iz perspektive postdejtonske žene“ imaćete priliku pročitati priče žena koje su istinske heroine, koje su mijenjale sebe, svoju lokalnu zajednicu, okruženje u kojem žive. Neke od njih su dugogodišnje aktivistkinje u borbi za prava žena, dok su druge aktivistkinje, a da toga nisu ni svjesne. Možda ste imali/e priliku da ih vidite, poslušate, sretnete, ali niste ni bili/e svjesni/e kakve su zapravo njihove priče, tako da je ovo idealna prilika da se njihovi glasovi čuju, da se priče ispričaju i da nam one budu zvijezde vodilje u daljem radu i životu. Ovo su ispričane životne priče žena koje

govore o stvarnosti, o tome gdje su one danas 25 godina nakon potpisivanja Daytonskog mirovnog sporazuma, šta za njih znači mir, da li žive u miru, da li su sretnе i zadovoljne s mogućnostima koje imaju ili se i dalje nalaze na marginama našeg društva. One su heroine, one mijenjaju naše društvo i okruženje i njihovi glasovi treba da se čuju.



Mapiranje jednoroditeljskih zajednica i njihovih prava u općini Centar je projekat jačanja položaja društveno marginalizovanih žena u našem društvu koji je podržala općina Centar Sarajevo. U okviru projekta urađena je analiza zakonske regulative, objektivnog stanja i potreba jednoroditeljskih zajednica, te dane konkretne preporuke za razvoj lokalnih politika koje uključuju i ovu društveno marginalizovanu populaciju. Također, dane su preporuke i lokalnim organima radi definisanja politika kojim bi se unaprijedio položaj navedene kategorije.



COVID-19 solidarnost - U vremenu globalne pandemije izazvane COVID-om 19, vanrednim okolnostima, pojačanim stresom i strahom za budućnost, Fondacija CURE je kroz svoju COVID -19 akciju solidarnosti podržala žene treće dobi, samostalne roditelje/ke, Romkinje, roditeljke djece sa invaliditetom i onkološke pacijentice, u potpunosti svjesne da su institucije sistema propustile da u mjere zaštite i podrške uključe one koje su i u normalnim životnim okolnostima potisnute na samu društvenu marginu.



Uz podršku donatora i sponzora naše COVID - 19 akcije, a to su TRAG Fondacija iz Republike Srbije i kompanije Alma RAS i AMKO Komerc iz Bosne i Hercegovine, u periodu od 15. juna do 20. jula 2020. godine, uspjele smo direktno podržati #50 žena i njihovih porodica sa šireg prostora Kantona Sarajevo i to žene treće dobi, roditeljke djece sa invaliditetom, onkološke pacijentice, samostalne roditeljke i Romkinje.

Tokom naše COVID-19 akcije solidarnosti #TiNisiSama, članice tima Fondacije CURE posjetile su svoje korisnice u njihovim domovima i svakoj od njih uručile voucher u iznosu od 50 KM za nabavku prehrambenih i higijenskih namirnica, kao i pre-paid voucher u iznosu od 20 KM za komunikaciju. U našem paketu solidarnosti nalazila su se i osnovna sredstva za dezinfekciju i zaštitu za naše korisnice i njihove porodice.

Naša poruka je **#nitijednaženanevidljiva!**

SADA JE VRIJEME je projekt čiji je cilj zagovaranje i poboljšanje zaštite ljudskih prava i temeljnih sloboda lezbijki, gejeva, biseksualnih, trans i interspolnih osoba (LGBTI) na zapadnom Balkanu i Turskoj (ZBiT) promicanjem, podržavanjem i postizanjem dinamičnijeg i uticajnijeg LGBTI pokreta koji aktivno sudjeluje u oblikovanju javnih rasprava o demokratiji, ljudskim pravima, socijalnoj i ekonomskoj uključenosti i vladavini zakona, te utiče na procese, politike i odlučivanje.



U skladu s kolektivno ocijenjenim potrebama i prioritetima svih kandidata i drugih organizacija članica ERA mreže koje predstavljaju LGBTI pokret na zapadnom Balkanu i Turskoj (ZBiT), posebni ciljevi ovog projekta su: 1) povećati kapacitete LGBTI organizacija na zapadnom Balkanu i Turskoj kako bi upravljali vlastitim razvojem i napretkom, postičući pravnu i finansijsku održivost i autonomiju, povećavajući odgovornost i reprezentativnost te podižući snažan glas u politici i pravnoj reformi, s posebnim naglaskom na organizacije koje rade na grass-roots nivou na lokalnoj razini; 2) jačanje regionalnog umrežavanja i izgradnje partnerstva među organizacijama civilnog društva, kao i saradnja s državnim tijelima na ZBiT izgradnjom, provedbom i održavanjem strateškog pristupa umrežavanju i iskorištavanju regionalne saradnje radi unaprjeđivanja LGBTI prava na nacionalnom nivou; 3) učinkovita

zaštita, podrška, promocija, monitoring i zagovaranje za ljudska prava i temeljne slobode LGBTI osoba na ZBiT na nacionalnom, regionalnom i međunarodnom nivou, posebno u kontekstu procesa integracija u EU koristeći inovacije i zagovaranje temeljeno na podacima i dokazima u cilju formulisanja i predlaganja novih i izmjena postojećih zakona i podzakonskih akata u prioritarnim područjima.

XV PitchWise festival ženske umjetnosti i aktivizma u BiH



U periodu od 10. do 13. septembra 2020. godine Fondacija CURE je u Sarajevu organizovala petnaesti PitchWise festival ženske umjetnosti i aktivizma kroz feminističku teoriju i praksu. Veoma smo ponosne i sretno što smo ove godine ugostile oko 200 osoba (tokom četiri dana) kako iz lokalne zajednice, tako i iz regije (Republike Srbije i Crne Gore), a tokom ovogodišnjeg programa predstavilo nam se oko 70 umjetnica, teoretičarki, aktivistkinja i feministkinja.

Po prvi put u historiji organizovanja PitchWise festivala, većina programa bila je pokrivena live streaming-om, te smo na taj način omogućile da se čuje glas i poruka mnogih naših heroina bez obzira na fizičku udaljenost. PitchWise festival, osim javnih prostora, osvojio je i prostore socijalnih mreža i uspjele smo trajno sačuvati govore aktivistkinja, umjetnica i teoretičarki o važnim pitanjima koja se odnose na žene u 2020. godini. Tokom petnaestogodišnjeg organizovanja ovog festivala, Fondacija CURE je kreirala prostor za povezivanje i umrežavanje feminističkog rada i kulture okupljajući umjetnice i aktivistkinje iz ženskih grupa BiH, zemalja regije i inostranstva.

Ženska mreža BiH

Ženska mreža BiH je u 2020. godini nastavila raditi na izgradnji svojih kapaciteta. Usvojile smo naš zajednički Feministički manifest. Izuzetno smo ponosne na iskazanu solidarnost svih članica Ženske mreže BiH za vrijeme lockdown-a izazvanog pandemijom COVID-a 19. Osim što smo sve svoje kapacitete stavile na raspolaganje lokalnim zajednicama, pružile smo i mogućnost građankama i građanima BiH da koriste naše kapacitete u vidu različitih savjetovališta (od psiholoških do pravnih) i na taj način dale podršku u ovim teškim vremenima. Redovno smo izvještavale o situaciji na terenu, te objavljivale informacije o online sistemima podrške. Posjetile smo naše članice u Travniku, Bihaću, Krupi, Banjaluci, Modriči, Bijeljini i Tuzli i iskazale svoju solidarnost, i to naročito sa ženama koje su bile smještene u sigurnim kućama, a razgovarale smo i sa političarkama i donositeljicama odluka. U saradnji sa Agencijom za ravnopravnost spolova BiH provele smo istraživanje u #3 lokalne zajednice o posljedicama pandemije na marginalizovane skupine žena. Objavile smo preko 77 članaka na našoj web stranici, od kojih preko 15 autorskih. Pisale smo o

eko feminizmu, izborima, iskustvima života u bosanskohercegovačkim izolatorijima. Članice Ženske mreže su u svojim lokalnim zajednicama implementirale #16 projekata u okviru strateške kampanje Ženske mreže BiH.



Naš web portal www.zenskamreza.ba predstavlja jedinstvenu platformu za zalaganje za unaprjeđenje položaja najranjivijih kategorija žena u bosanskohercegovačkom društvu.

Globalna kampanja 16 dana aktivizma protiv rodno zasnovanog nasilja i ulične akcije

Fondacija CURE je organizovala uličnu akciju povodom Međunarodnog dana borbe protiv nasilja nad ženama i početka Globalne kampanje 16 dana aktivizma s temom: „Kad dom ne znači sigurnost!“. Razlog za izbor ove teme su mnogobrojne kampanje koje su uključivale promociju mjera fizičkog distanciranja u svrhu zaštite od COVID-a 19, a vođene su pod sloganom #ostanikući promovišući politiku da je „dom sigurno mjesto“. Međutim, za mnoge žene širom BiH i svijeta, dom nije sigurno mjesto. Izolacija i fizičko distanciranje u domovima mnogim ženama je značilo povećan rizik od porodičnog nasilja. Dom nije uvijek sigurno mjesto za žene, a posebno su u opasnosti tokom lockdown-a jer ne mogu pobjeći od svojih zlostavljača. Na uličnoj akciji prisustvovalo je 15 aktivistkinja i volonterki Fondacije CURE.



CURE PARTNERSTVA

Inicijativa za afirmativne izmjene i dopune udžbeničkog sadržaja u srednjim školama u Kantonu Sarajevo

U 2020. godini organizovale smo online sastanak sa članovima/icama ove inicijative (Fondacija CURE, Krila nade, Sarajevski otvoreni centar i Udruženje INFOHOUSE), kako bismo radili/e na poboljšanju i reviziji obrazovanja u cilju promovisanja rodne i spolne ravnopravnosti, izmjeni diskriminatornog sadržaja i sadržaja koji u sebi sadrži materijal za stvaranje predrasuda, te radi kreiranja inkluzivnog sadržaja o svim marginalizovanim grupama koje se nalaze u bh. društvu.

Inicijativa „Građanke za ustavne promjene“

Inicijativa „Građanke za ustavne promjene“ čijim radom upravlja Helsinški parlament građana Banja Luka u saradnji s Fondacijom CURE, ima za cilj osigurati vidljivost problematike nevidljivosti žena u Ustavu BiH i pokrenuti ustavne reforme u BiH. Fondacija CURE upravlja društvenim mrežama Inicijative (blog, Facebook page i Twitter) i u 2020. godini zabilježila je preko 40 medijskih objava i nastupa, kao i 8.000 pregleda i preko 4.000 posjeta blogu Inicijative.



Mir sa ženskim licem

Fondacija CURE, kao članica Inicijative „Mir s ženskim licem“, organizovala je 08.12.2020. godine u Sarajevu uličnu akciju povodom nezvaničnog Dana sjećanja na žene stradale u ratu s ciljem da se skrene pažnja na očuvanje sjećanja na ove žene. Tokom izrade leksikona „100 žena - 100 ulica po ženama“ dale smo svoje nominacije za sarajevske heroine koje su ušle u leksikon.



MREŽE U KOJIMA JE FONDACIJA CURE AKTIVNA

Mreža za izgradnju mira osnovana je u februaru 2010. godine. Radi na obnovi kvalitete društvenog i ekonomskog života u BiH, kao i na dugoročnom povećanju sposobnosti cijelog bh. društva da se nosi s različitostima i sukobima na konstruktivan i nenasilan način, te time stvara okvir za zajedničko, koordinisano djelovanje niza nevladinih organizacija, lokalne uprave i samouprave, poslovnog sektora, medija i državnih institucija. Fondacija CURE je aktivna članica Mreže i članica Upravnog odbora Mreže.

Anna Lindh Fondacija

Fondacija CURE je od 2015. godine članica bosanskohercegovačke mreže Anna Lindh Fondacije koja je članica međunarodne ALF mreže. U 2019. godini održan je godišnji sastanak na kojem je sumiran rad mreže u proteklih deset godina postojanja, podijeljena iskustva, te isplanirale aktivnosti za naredni period kao i učestvovanje mreže na međunarodnim događajima. Fokus je stavljen na procjenu rada i mapiranje članica.

OSTALE AKTIVNOSTI FONDACIJE CURE

Dan bijelih traka je dan sjećanja na događaje koji su počeli 31.maja 1992. godine na području općine Prijedor. Lokalne vlasti u Prijedoru tada su naredile svim građanima nesrpske nacionalnosti da na kuće okače bijele plahte, a oko ruke nose bijele trake. Iako svake godine obilježavanju ovog dana prisustvuje nekoliko hiljada građana/ki Prijedora, zbog pandemije koronavirusa odobreno je okupljanje manjeg broja osoba. Aktivistkinje Fondacije CURE su mirnom šetnjom kroz prijedorske ulice odale počast za 102 ubijene djece, te se trudile biti podrška roditeljima koji su govorili i šetali Prijedorom



8. MART

Fondacija CURE je zajedno sa svim zainteresovanim pojedinkama/pojedincima, predstavnicima/ama organizacija i formalnih/neformalnih grupa, te sa članovima/icama Ženske mreže BiH organizovala aktivističku šetnju/marš povodom 8. marta, Međunarodnog dana žena.

Mirnim maršom skrenule smo pažnju na probleme s kojima se suočavaju žene u BiH i svijetu. O historijatu osmog marta i međunarodnoj borbi i zalaganju žena za pravo glasa, jednake plate, jednake uslove rada, pravo na abortus, skraćenje radnog vremena i ekonomsku sigurnost, ali i bolji kvalitet života se ili premalo zna ili namjerno zaboravlja.



Nakon aktivističke šetnje, u Parkuši je izveden performans „Un violador en tu camino” („Nasilnik na tvom putu”) u organizaciji studentica Centra za interdisciplinarnе studije (ERMA) i Fondacije CURE. Na ovom događaju je učestvovalo više od 50 osoba.

POZITIVNA PRIČA VOLONTERKE

U 2020. godini uspjele smo raditi sa više od 20 volonterki koje su odlučile da svoj doprinos u kreiranju boljeg društva daju kroz volontiranje u Fondaciji CURE. Izdvajamo samo jednu od brojnih pozitivnih priča:

Marija: „Kakve su CURE? Inspirativne heroine koje menjaju svet, Denija i Medina kroz svoju edukaciju devojčica, Vildana kroz svoj politički aktivizam, Vedrana, Sanda i Sabina kroz radionice integrisane bezbednosti za mlade aktivistkinje, i Jadranka kroz svoje povezivanje svega u jednu predivnu celinu. Naravno da one rade mnogo više od toga, ali teško je opisati praksu i svaku od njih na način na koji zaslužuju. Svaka od njih je donela ljubav i inspiraciju u Sarajevo. Mogu samo zaključiti na kraju kvalitetno provedenih mesec dana sa CURAMA! Ne kajem se ni zbog jedne sekunde provedene sa njima!“

CURE PUBLIKACIJE I ISTRAŽIVANJA

FEMINISTIČKE VRIJEDNOSTI U ISTRAŽIVANJU - PITANJE DOBROBITI, SAMOBRIGE I LJUBAVI AKTIVISTKINJA



■ FEMINISTIČKE VRIJEDNOSTI U ISTRAŽIVANJU-
PITANJE DOBROBITI, SAMOBRIGE
I LJUBAVI AKTIVISTICA

Publikaciju je za Fondaciju CURE izradila Sabina Lizde, a u svrhu izdavanja urađeno je istraživanje koliko aktivistkinje i braniteljke ženskih prava znaju o konceptu integrisane sigurnosti. Integrisana sigurnost je koncept koji ima za cilj istražiti kako braniteljke ljudskih prava i aktivistkinje mogu bolje razumjeti prijetnje i rizike (unutrašnje i vanjske) koji su usmjereni protiv njih, kao i strategije kojima već imaju pristup i praksu kako bi ublažile uticaj rizika i zaštitile sebe, održale svoj aktivizam, svoje organizacije i pokret.

Publikacija je dostupna na linku:
https://fondacijacure.org/wp_site/wp-content/uploads/2020/09/ISW-prirucnik_WEB.pdf

AKCIONI PLANOVI

U 2020. godini izrađeno je pet akcionih planova – agenda koji se odnose na potrebe žena u pet odabranih općina u kojima djeluje pet ženskih organizacija/grupa u čijem fokusu djelovanja su manjinske i marginalizovane grupe žena. Akcioni planovi su izrađeni u saradnji FWE-a i CURA sa članicama navedenih ženskih organizacija/grupa i njihovim saradnicima/ama, predstavnicima/ama lokalnih institucija kao što su opštine, zdravstvo, centri za socijalni rad, zavodi za zapošljavanje i predstavnicima/ama nevladinih organizacija.

U cilju promocije i zaštite ženskih prava te iskorjenjivanju diskriminacije žena s posebnim fokusom na žene i djevojke pripadnice marginalizovanih i manjinskih grupa u deset opština u Bosni i Hercegovini, Evropska unija finansira projekat Ženska prava – Agenda za pozitivne promjene koji provode Fondacija CURE (CURE) i Fondacija za osnaživanje žena (FWE).

„Ko ti kontroliše novčanik? Kako prepoznati ekonomsko nasilje nad ženama i djevojkama“ naziv je brošure koja je izrađena u okviru projekta Feminist policy advocacy in BiH (Zagovaranje feminističke politike u BiH).

U publikaciji „Suočavanje s nemirom i izgradnja mira iz perspektive postdejtonske žene“ istraživačice Ajne Jusić imaćete priliku pročitati priče žena koje su istinske heroine, koje su mijenjale sebe, svoju lokalnu zajednicu, okruženje u kojem žive. Neke od njih su dugogodišnje aktivistkinje u borbi za prava žena, dok su druge aktivistkinje, a da toga nisu ni svjesne. Možda ste imale/i priliku da ih vidite, poslušate, sretnete, ali niste ni bili/e svjesni/e kakve su zapravo njihove priče, tako da je ovo idealna prilika da se njihovi glasovi čuju, da se priče ispričaju i da nam one budu zvijezde vodilje u daljem radu i životu. Ovo su ispričane životne priče žena koje govore o stvarnosti, o tome gdje su one danas 25 godina nakon potpisivanja

Daytonskog mirovnog sporazuma, šta za njih znači mir, da li žive u miru, da li su sretni i zadovoljne mogućnostima koje imaju ili se i dalje nalaze na marginama našeg društva. One su heroine, one mijenjaju naše društvo i okruženje i njihovi glasovi treba da se čuju



Publikacija je dostupna na:

https://fondacijacure.org/wp_site/wp-content/uploads/2020/12/Suo%C4%8Davanje-s-nemirom-i-izgradnja-mira-iz-perspektive-postdejtonske-%C5%BEene-2.pdf,

a film na Youtube kanalu Fondacije CURE.

MEDIJSKA VIDLJIVOST

U 2020. godini Fondacija CURE je zabilježila 217 medijskih pojavljivanja. U elektronskim medijima registrovano je oko 11 sati emitovanja na 20 različitih TV i radio stanica, odnosno 85 TV i radio gostovanja i 123 objavljenih vijesti u online medijima. U štampanim medijima smo dokumentovale 9 objavljenih članaka, ali to nije konačan broj, nego onaj koji smo uspjeli registrovati.

ONLINE KAMPANJE: U 2020. godini smo organizovale online kampanju u okviru projekta Ženska prava - Agenda za pozitivne promjene kojeg finansira Evropska unija i gdje smo dostigle više od 10.000 pregleda naših postova, te imale do 20.000 indirektnih učesnika/ca i preko 70 postova uključujući Instagram i Facebook.

2020. godina nas je naučila da sve događaje iz offline sfere djelovanja u obliku panela i radionica prebacimo u online sferu djelovanja putem Zoom platforme, ali i mnogih drugih koje smo koristile za vrijeme lockdown-a u Bosni i Hercegovini. Međutim, i nakon lockdown-a došle smo u situaciju da korisnici/e traže da se sve odvija i putem digitalnih kanala. Tako smo PitchWise festival pored događaja uživo prenosili i putem društvenih mreža Fondacije CURE. Analiza live stream-a PitchWise festivala 2020. nam je pokazala da je 6 live stream-a došlo do 29.979 osoba, da imamo ukupno 11.235 pregleda, da su video prikazi dijeljeni 61 put i da je 2.956 osoba bilo angažovano i reagovalo tokom live stream-a. Na socijalnoj mreži, odnosno Facebook fan page-u, zabilježile smo rast od 24% u odnosu na 2019. godinu i trenutno imamo 5.037 lajkova i 5493 pratilaca/pratiteljki, PitchWise fan page ima 2.242 lajka i 2.287 pratilaca/pratiteljki. Online web statistika na stranici www.fondacijacure.org zabilježila je više od 9.372 posjete, od toga novih korisnika/ca je 9,2%.

Fondacija CURE kao koordinirajuća organizacija Ženske mreže Bosne i Hercegovine vodi web stranicu www.zenskamreza.ba na kojoj je objavljeno 77 tekstova/članaka na lokalnom jeziku i 7 na engleskom jeziku. Zabilježeno je 18.968 korisnika/ca od čega 18.635 novih korisnika/ca, odnosno u procentima 90,5% novih korisnika/ca, dok je stalnih posjetilaca/posjetiteljki koji se vraćaju na web stranicu 9,5%. Analitika korisnika/ca Facebook fan page-a ŽM BiH pokazuje 3.250 lajkova (3.250 osoba se sviđa Fan page ŽM BiH), dok 3.427 osoba prati objave na Fan page-u ŽM BiH.

Statistika live stream-a PANELA „Snaga je u nama! Gradimo mir!” pokazuje sljedeće: osoba: 12.835, angažmana: 1.239, lajkova: 74, komentara: 23, dijeljenja: 22, pregleda: 5.200. Cjelokupni panel je snimljen i može se pogledati na: <https://www.youtube.com/watch?v=FU2QSjhZAXY>

WEB STRANICA FONDACIJE CURE: naša online statistika na stranici www.fondacijacure.org u 2020. godini pokazuje 10.130 posjeta sa različitih IP adresa, a registrovale smo i 12.492 pročitanih vijesti koje smo objavljivale.

DONATORKE I DONATORI:

Kvinna till Kvinna, Women's World Day of Prayer, Fondacija TRAG/Fondacija OAK, Die Feministische Friedensorganisation CFD, Friedrich Ebert Stiftung, Heinrich Böll Stiftung BiH, ISCOS Emilia Romagna - The Trade Unions Institute for Development Cooperation, ASTRAEA-Lesbian Foundation for Justice, Američka ambasada Sarajevo, Državni sekretarijat SAD-a, Mediterranean Women's Fund, Heart and Hand Fund, općina Centar Sarajevo.

Fondacija CURE želi da se zahvali svima vama – prijateljicama i prijateljima iz Bosne i Hercegovine i cijeloga svijeta na vašoj kontinuiranoj pažnji, podršci i prijateljstvu koje nam bezrezervno pružate sve ove godine.

Fondacija CURE media:


Web: www.fondacijacure.org

Instagram: @fondacijacure

Twitter: @Fondacija_CURE

Facebook: fondacijacure

YouTube: Fondacija CURE



CURE

ENNO